

中國邊疆叢書第一輯

王 河 等 修

欽定盛京通志
(二)

文海出版社印行

盛京通志卷之二十一

學校

聞之揆文奮武時地異宜重道崇儒後先一致我

太祖締造丕基百度肇舉

太宗創業垂統鼎建學宮遂開詩書禮樂之化逮

世祖章皇帝

聖祖仁皇帝

聖聖相承凡所爲弘文治尊正學者有加無已至

世宗憲皇帝臨雍講學崇聖推恩猗歟偉哉昭古今之曠典

洵繼述之隆規也

留都重地首善名區絃誦成風人材蔚起瞻望宮牆而
興水源木本之思則隨時脩葺自有所不能已矣
奉天府儒學

在府治東南隅考明時瀋陽中衛學在衛治西北隅
正統元年重建

本朝天聰三年改建今地初建

聖殿三間戟門三間櫺星門一座設銀爵二十七康熙
五年增修學宮竝建

啟聖祠十九年府尹梁拱辰重修

聖殿二十一年府尹高爾位增建東西廡各三間二十

五年

御製

至聖先師孔子贊頒布天下勒石學宮二十八年頒

御書萬世師表扁額奉懸

大成殿各州縣同二十九年立下馬牌於學宫外三十
二年工部請修

啟聖祠三間增建明倫堂三間東西齋房各三間大門
儀門並東西角門各一座學署六間庫房書房西房
各二間並設守衛步兵十名四十九年府尹廖騰塗
率屬及紳士等捐貲增修

聖殿爲五間竝增大成門一座啟聖門一座照壁三楹
義路禮門各一座繚垣二百丈後又增建名宦鄉賢
祠各一間五十一年奉朱子升配十哲之次五十四
年以宋儒范仲淹從祀雍正元年追封

孔子五代

木金父公爲肇聖王

祈父公爲裕聖王

防叔公爲詒聖王

伯夏公爲昌聖王

叔梁公爲啟聖王改啟聖祠爲

聖祠各州縣同二年復先需明代黜祀者六人林放
蘧瑗秦冉顏何范甯鄭康成增祀孔子弟子縣直牧
皮孟子弟子樂正克公都子萬章公孫丑漢諸葛亮
宋尹焞魏了翁黃幹陳淳何基王栢趙復元金履祥
許謙陳皓明羅欽順蔡清

本朝陸隴其共二十人

崇聖祠增宋張載父張廸一人從祀四年頒

御書生民未有扁額奉懸

大成殿各州縣同九年府尹黎致遠率屬及紳士等捐
貲重修殿廡門壁等處

遼陽州儒學

在城東門內元初設於舊都司治後明洪武中都指揮潘敬葉旺移建於此永樂壬辰都指揮巫凱塑

先師及諸賢像正統丙寅都督王祥重修景泰癸酉御史謝燦建尊經閣成化初副總兵韓斌重修乙未御史潘宣置祭器弘治壬子御史宋鑑建四齋及東西號房癸丑鑿泮池戊午御史羅賢改建櫺星門辛酉御史車梁重建尊經閣正德乙亥御史劉成德修廡像設雅樂巡按高越續建名宦祠嘉靖己丑御史王重賢拓其南壘石爲山鑿泮池丁酉御史史褒善重修

殿廡堂齋泮池三面坊牌增建鄉賢祠御史胡文舉
建遼左書院一習武書院一社學六後皆廢

本朝康熙十二年知州吳承基請卽舊址建

聖殿三間四十九年知縣富中琰捐貲重修奉天府經
歷張禹錫署州事與學正陳五紀續爲經理增

聖殿爲五間五十年增建東西廡共六間五十一年知
州陳學海又增兩廡至十間五十八年海城知縣王
玉璿署州事建

啟聖祠三間六十年知州王瀚建文昌祠三間雍正三
年建戟門三間櫺星門一座

海城縣儒學

按舊志明洪武十八年建海州衛學宣德元年遷城南門內成化五年重修弘治五年遷城東南隅立敬一箴亭後俱廢

本朝順治十一年設海城縣知縣王全忠於舊城西南隅建

聖殿三間康熙七年知縣趙文炳建

啟聖祠三間十七年知縣江溥重修

正殿增建東西兩廡十九年知縣陳王星增建戟門一座五十年知縣王沛恂捐募重修增建明倫堂三間

書忠義節孝四大字於壁雍正五年知縣張士毅遷學宮於新城內厝石山陽竝增建東西角門及八字牆照壁等處仍於學宮故址重修明倫堂三間

蓋平縣儒學

按舊志蓋州衛學在衛治東南係明洪武癸亥年指揮吳立張良佐建後廢

本朝康熙十一年於衛地設縣知縣劉羽繩於城內西北隅建

聖殿三間四十一年知縣趙守易重修竝增櫺星門一座東西角門二間五十四年知縣郭運昭復移建於

東南隅六十一年典史王震協同士民等捐建東西廡各三間雍正八年又捐建

崇聖祠三間

開原縣儒學

考縣治北舊有元大德年加封

大成文宣王廟碑明設三萬衛學至成化中重修者三南城上有奎星樓至

本朝初斷碑遺址猶存康熙四年知縣何金序建

聖殿三間於城內東偏十八年知縣劉超凡建櫺星門三間左右木坊二座二十二年知縣周志煥重修

正殿二十四年增建

啟聖祠三間四十九年知縣李渥捐俸建東西廡各三間重修櫺星門並增大成門三間五十九年知縣萬如濟訓導李如瑞倡士民捐修

啟聖祠開鑿泮池

鐵嶺縣儒學

考舊志明正統元年於鐵嶺衛治東南建學嘉靖十六年重修後廢

本朝康熙三十七年知縣許志進於城東建

聖殿三間櫺星門一間五十年知縣焦獻猷捐修明倫

堂三間復議建

啟聖祠三間

永吉州儒學

雍正五年新設州治儒學議建

長寧縣儒學

雍正五年設縣儒學議建

復州儒學

州治舊有復州衛學明季移於山東

本朝雍正十二年於舊衛城設州學宮議建

寧海縣儒學

本金州衛地衛學舊址碑記可辨明季移金州衛學
於山東

本朝雍正十二年於金州設縣學宮議建

錦州府儒學

在府治西卽明中左屯衛學正統元年巡撫李公溶
疏請創建成化己亥指揮白欽增修嘉靖丙寅巡撫
魏學會鎮守王治道等重修江奎有碑記其事

本朝康熙五年知府宋之鉉因舊制重修

聖殿三間續修

啟聖祠一所東西廡各三間明倫堂五間十七年知府

劉源溥重修戟門泮池等處二十三年知府孫成
修東西木坊二座三十九年歲貢陳芝秀於城東
隅修文昌宮四十年知府顧大位重修殿廡坊門等
處四十一年衆紳士建奎星樓五十年知府唐之夔
教授何來似同捐修戟門泮池五十八年大司成尹
泰知府馬鍾華知縣周廷槐教授閻九疇倡紳士等
捐修

聖廟生員劉俶捐修照壁一座雍正三年文昌宮燬紳
士等捐貲重建

錦縣儒學

在府治西北康熙四十四年知縣裘奏捐建

聖殿三間

啟聖祠三間五十年知府唐之夔知縣冷又煦同捐建
東廡西廡戟門各三間及泮池繚垣等處雍正二年
知縣王承孟教諭時雨倡紳士等重修殿廡並建櫺
星門三楹照壁一座名宦鄉賢祠各一間

寧遠州儒學

在州治東明宣德五年建景泰四年重修舊有

聖殿五間東西廡各十間戟門五間櫺星門三楹門內
東偏有鄉賢祠三間已多傾圯